



Uunga siunnersuut: Suliffissarsiornermut ikiorsiissutit pillugit Inatsisartut inatsisissaat

(Isumaginninnermut, Suliffeqarnermut Nunamullu Namminermt Naalakkersuisoq)

(Siullermeerneqarnera)

Uunga siunnersuut: Pisortanit ikiorsiissutit pillugit Inatsisartut inatsisissaattut siunnersuut

(Isumaginninnermut, Suliffeqarnermut Nunamullu Namminermt Naalakkersuisoq))

(Siullermeerneqarnera)

Qularutissaanngilaq pisortat ingerlatsinerini aaqqissuusseqqinnissat annertuut pisariaqartinneqarmata. Pivusoq unaavoq, ilisimatuut tamarmik isaanniik siunissarput imaamat maannakkut atugarissaarneq ilisimasarput ingerlatiinnarniarutsigu ukiumut 1 milliard koruunit amigaatigisalisagatsigit. Nalunangilarlu kisimi pisortat ingerlatsineranni aaqqissuusseqqinnikkut aningaasat taakku aaneqarsinnaanngimmata, isumalluartaqarpugulli. Isumaqqanngilangali Naalakkersuisut siunnersuutit ukua saqqummiunnerinik taamaattut.

Siunnersuutit ataatsimut isigalugu pisortat ingerlatsineranni aningaasanik sipaaruteqarnaviangillat. Siunnersuutit aningaasartuutininik annertuseriartitsissapput. Saamasumik oqaatigalugu inissisimaffik maannakkut atuuttumut isumatusaarnerunngillat.

Taamatut oqarluta siunnersuutit ajortuinnaangillat. Qulaaninngaanniit isigalugit kikkut sulileriaannaanersut kikkullu piareersimannginnermut immikkoortitsillu arnerulissammata isumatusaarneruvoq. Taamatuttaarlu pitsaasuvoq sulileriaannaat suliffissarsiortuarnissaannik piomasaaqateqarnermi sukaterissammata. Pisortaniit ikiorsiissuteqartarneq allatut aaqqissuunera isumatusaartuuvuq. Pitsaasuuvorlu pisortaniit ikiorsiissutinik pisartagallit maanna sunik suliaqarsinnaanerininik sunillu suliaqarsinnaannginnerininik immikkut isiginiarnerusoqalissammat taamaasilluni inunnut ataasiakkaanut perusissianik pitsaasunik tulluarsakkanillu sanasoqartalissammat, sulilersitsinissamut aqqutissiuussinerusinnaasunik. Pingaaruteqarpoq tamarmik piffissaq tamaat sulisinnaanissaanik immikkut isiginiassannginnatsigit, kisiannili inuttut ataasiakkaatut qanoq tunniussaqaarnerpaasinnaanersut qiviassallugit. Eqqaamassavarput inuttut ataasiakkaatut pingaaruteqarneq naleqarnerlu misigitissagatsigu.

Tamanna oqaatigereerlugu eqqumiigivara maannakkut match-gruppenik taaneqartartunit una aaqqissuusseqqinneq qanoq allaanerunersoq. Eqqarsariaqqaarneq siulleq imeruarsaat puujaasamut allamut nuuginnakkatut sanillersuunnarpoq. Taamaattumik nutaamik eqqarsartariaqavissorpugut, suliffissarsiortutullu suliffeqarnerup silarsuaanut appakaannissamut qilanaarnartuunissaa annertusartariaqarparput. Taamaattumik Naalakkersuisut suliffissanik amerlisaanerininik suliffissarsiortullu ajornannginnerusumik nuussinnaaneranut tunngasunik suliniuteqartariaqarput, inatsimut ikorfartuisinnaasumik.



Uani siunnersuummi suliffissarsiortunut periusissianik sanasarnissamut Majoriaq kommuunillu akisussaaffimmik annertuumik tunineqarput. Eqummaariffigisariaqarparput suliassanik pujoralammik katersisussanik suliffissarsiortunillu nikisitseriannngitsumik kinguneqalissanngimmat. Nammineq pilersorsinnaaneq anguniagaqarfiginissaa uannit pingaarnertut inissimagaluarpoq, soorlu suliffissarsiortut aalanerunissaanik piumasaqaateqarnikkut. Nammineq pilersorluni inuuneq peqqissumik toqqissimasumillu inuunissaq ingerlaqatigisariaqaraluarpaa. Politikikkut aalajangikkat pitsaasumik piviusunngortissagutsigit qularinngilara anguniagaqarluartariaqartoq sapiissuseqarluarlunilu.

Isumatusaerneruvorli sulineq akilersinnaajuaannartinnissaata anguniagarinera. Perusuppungali apeqqusingaatsiassallugu suliffissarsiortunermi ikiorsiissutinik pisarnissamik siunnersuuteqarneq ilumut taamatut siunertaqarnersoq. Killormut isumaqarpunga siunnersuutip angerlarsimaannarnissap soqutigintuunissaanik kinguneqaannarnissaanik ernumanaateqartoq.

Suliffissarsiortunermi ikiorsiissutinik pisarnissamik siunnersuuteqarnermi qaammatit arfinillit ingerlaneranni suliffissarsiortutut allaqqagaanni SIK-mi akissarsiat 90%-ii akissarsiarineqartassapput. Tamanna ilinniarsimannngitsumik suliffeqartumut sapaatip akunneranut 40 tiimit sulisartumut sanilliunneqarsinnaavoq. Ilinniarsimanani suliffeqarniaraanni iluanaarutissaq annikitsuararsuussaaq.

Uani isiginiartariaqarparput ilumut pissusissamisoornersoq. Eqqaamasariaqarparput suliffissarsiortunermi ikiorsiissutinik pisartagaqarsinnaasut tamarmik sulilernissaminnut pisáreeqqasutut nalunaarsorsimassapput. Tassa imatut paasineqassaaq sulinissaminnut aporfissaqanngillat, taamaasiunnginnissamullu utoqqatsissutissaqanngillat. Taamaattumik ingasappallaartutut taaneqarsinnaavoq inuit taakku ilinniarsimannngitsutulli, sapaatip akunneranut 40 tiimit fabrikkimi hotelimiluunniit suleruluttartutut akissarsiaqartassappata. Naatsumik oqaatigalugu pissusissamisuunngilaq suliffissarsiortumullu ilinniarsimannngitsutut suliffeqarnissamut kajuminnissaq pisariaqartinneqartoq piunaviannngilaq, angerlarsimaannarnissaanullu kinguneqassaaq.

Siunnersuutit suliareqqinneqarnissaanut innersuunneqartumut Ilaqutariinnermut Peqqissutsimullu ataatsimiitsitaliaq suliassanik ulikkaarpoq. Ataatsimiitsitaliaq anguniagarisariaqarppaa siunnersuutit ataatsimut isigalugit ullumikkut pisortat ingerlatsinerannut sammisaq suli aningaasartorfiginerulernissaanik kinguneqassanngitsut. Ataatsimiitsitaliaq anguniagarisariaqarpaattaaq suliffissarsiortunermut ikiorsiissuteqartarnissaq angerlarsimaannarnani ilinniarsimannngitsutut suliffeqarnissamut suli kajumernartuunissaa taamatuttaarlu suliffissarsiortunermi minnerpaamik suliartaqartinneqartarnissaanik allannguutissatut siunnersuuteqarfigissallugu.